

摘藻堂四庫全書薈要

史部

欽定四庫全書薈要卷四千五十一

史部

晉書卷二十二

唐太宗文皇帝御撰

志第十二

樂志

夫性靈之表不知所以發於詠歌感動之端不知所以  
關於手足生於心者謂之道成於形者謂之用譬諸天  
地其猶影響百獸率舞而況於人乎美其和平而哀其

喪亂以茲援律乃播其聲焉農瑟義琴倕鐘和磬達靈  
成性象物昭功由此言之其來自遠殷氏不綱遺風餘  
孽淫秦既興雅章奔散英莖之制蓋已微矣孔子曰人  
能弘道非道弘人周始二南風兼六代昔黃帝作雲門  
堯作咸池舜作大韶禹作大夏殷作大濩周作大武所  
謂因前王之禮設俯仰之容和順積中英華發外書稱  
命夔典樂教胄子則周官所謂奏大呂歌黃鍾天貺來  
下人祇動色抑揚周監以弘雅音及褒艷興災平王逢

亂禮廢親踈樂沈河海是以延陵季子聞歌小雅曰其  
周德之衰乎猶有先王之遺風焉而列壤稱孤各興吟  
詠魏文侯聆古樂而恐臥晉平公聽新聲而忘食先王  
之道漸以陵夷八方殊風九州異則秦氏并吞遂專刑  
憲至於絃歌詩頌干戚旄羽投諸烟火掃地無遺漢祖  
提劍寰中削平天下文匪躬於德化武有心於制作太  
后擯儒家之道大臣排賈氏之言搢紳先生所以長歎  
而子政仲舒猶不能已也炎漢中興明皇帝即位表圭

景而陳清廟樹槐陰而疏璧流祀光武於明堂以配上  
帝召桓榮於太學袒而割牲濟濟焉皇皇焉有足觀者  
自斯厥後禮樂彌殷永平三年官之司樂改名大予式  
揚典禮旁求圖讖道隣雅頌事適中和其有五方之樂  
者則所謂大樂九變天神可得而禮也其有宗廟之樂  
者則所謂肅雍和鳴先祖是聽者也其有社稷之樂者  
則所謂琴瑟擊鼓以迓田祖者也其有辟雍之樂者則  
所謂移風易俗莫善於樂者也其有黃門之樂者則所

謂宴樂羣臣蹲蹲舞我者也其有短簫之樂者則所謂  
王師大捷令軍中凱歌者也魏武挾天子而令諸侯思  
一戎而匡九服時逢吞滅憲章咸盪及削平劉表始獲  
杜夔揚輦摠干式遵前記三祖紛綸咸工篇什聲歌雖  
有損益愛翫在乎雕章是以王粲等各造新詩抽其藻  
思吟詠神靈贊揚來饗武皇帝採漢魏之遺範覽景文  
之垂則鼎鼎維新前音不改泰始九年光祿大夫荀勗  
始作古尺以調聲韻仍以張華等所制高文陳諸下管

永嘉之亂伶官既減曲臺宣榭咸變污萊雖復象舞歌  
工自胡歸晉至於孤竹之管雲和之瑟空桑之琴泗濱  
之磬其能備者百不一焉夫人受天地之靈蘊菁華之  
氣剛柔遞用哀樂分情經春陽而自喜遇秋彫而不悅  
遊乎金石之端出乎管絃之外因物遷逝乘流不反是  
以楚王升輕軒於彭蠡漢順聽鳴鳥於樊衢聖人功成  
作樂化平裁曲乃揚節奏以暢中和飾其歡欣止於哀  
思者也凡樂之道五聲八音六律十二管爲之綱紀云

五聲宮爲君宮之爲言中也中和之道無往而不理焉  
商爲臣商之爲言強也謂金性之堅強也角爲民角之  
爲言觸也謂象諸陽氣觸物而生也徵爲事徵之爲言  
止也言物盛則止也羽爲物羽之爲言舒也言陽氣將  
復萬物孳育而舒生也古人有言曰禮樂不可斯須去  
身化上遷善有如不及是以聞其宮聲使人溫良而寬  
大聞其商聲使人方廉而好義聞其角聲使人惻隱而  
仁愛聞其徵聲使人樂養而好施聞其羽聲使人恭儉

而好禮

八音八方之風也乾之音石其風不周坎之音革其風廣莫艮之音匏其風融震之音竹其風明庶巽之音木其風清明離之音絲其風景坤之音土其風涼兌之音金其風閭闔

陽六爲律謂黃鐘太簇姑洗蕤賓夷則無射陰六爲呂謂大呂應鐘南呂林鐘仲呂夾鐘凡有十二以配十二辰焉律之爲言法也言陽氣施生各有法也呂之爲言

助也所以助成陽功也正月之辰謂之寅寅者津也謂  
生物之津塗也二月之辰名爲卯卯者茂也言陽氣生  
而孳茂也三月之辰名爲辰辰者震也謂時物盡震動  
而長也四月之辰謂爲巳巳者起也物至此時畢盡而  
起也五月之辰謂爲午午者長也大也言物皆長大也  
六月之辰謂之未未者味也言時萬物向成有滋味也  
七月之辰謂爲申申者身也言時萬物身體皆成就也  
八月之辰謂爲酉酉者緝也謂時物皆緝縮也九月之

辰謂為戌戌者滅也謂時物皆衰滅也十月之辰謂為  
亥亥者刻也言時陰氣刻殺萬物也十一月之辰謂為  
子子者孳也謂陽氣至此更孳生也十二月之辰謂為  
丑丑者紐也言終始之際以紐結為名也十一月之管  
謂之黃鐘黃者陰陽之中色也天有六氣地有五才而  
天地數畢焉或曰冬至德氣為土土色黃故曰黃鐘正  
月之管謂為太簇簇者族也謂萬物隨於陽氣太簇而  
生也三月之管名為姑洗姑洗者姑枯也洗濯也謂物

生新潔洗除其枯改柯易葉也五月之管名爲蕤賓歲  
蕤垂下貌也賓敬也謂時陽氣下降陰氣始起相賓敬  
也七月之管名爲夷則夷平也則法也謂萬物將成平  
均皆有法則也九月之管名爲無射射者出也言時陽  
氣上升萬物收藏無復出也十二月之管名爲大呂呂  
者助也謂陽氣方大陰氣助也十月之管名爲應鍾應  
者和也謂歲功皆成應和陽功收而聚之也八月之管  
名爲南呂南者任也謂時物皆秀有懷任之象也六月

之管名爲林鐘林者林茂也謂時物茂盛於野也四月  
之管名爲仲呂呂者助也謂陽氣盛長陰助成功也二  
月之管名爲夾鐘夾者佐也謂時物尚未盡出陰德佐  
陽而出物也漢自東京大亂絕無金石之樂樂章亡缺  
不可復知及魏武平荊州獲漢雅樂郎河南杜夔能識  
舊法以爲軍謀祭酒使創定雅樂時又有散騎侍郎鄧  
靜尹商善訓雅樂歌師尹胡能歌宗廟郊祀之曲舞師  
馮肅服養曉知先代諸舞夔悉摠領之遠詳經籍近採

故事考會古樂始設軒懸鐘磬而黃初中柴玉左延年  
之徒復以新聲被寵改其聲韻及武帝受命之初百度  
草創泰始二年詔郊祀明堂禮樂權用魏儀尊周室肇  
稱殷禮之義但改樂章而已使傅玄爲之詞云

祀天地五郊夕牲歌

天命有晉 穆穆明明 我其夙夜 祇事上靈 常

于時假 迄用有成 於薦玄牡 進夕其牲 崇德

作樂 神祇是聽

祀天地五郊迎送神歌

宣文蒸哉 日靖四方 永言保之 夙夜匪康 光

天之命 上帝是皇 嘉樂殷薦 靈祚景祥 神祇

降假 享福無疆

饗天地五郊歌

天祚有晉 其命維新 受終于魏 奄有黎民 燕

及皇天 懷和百神 丕顯遺烈 之德之純 享其

玄牡 式用肇禋 神祇來格 福祿是臻 時邁其

猶 昊天子之 祐享有晉 肇庶戴之 畏天之威

敬授人時 玉顯丕承 於猶繹思 皇極斯建 庶

績咸熙 庶幾夙夜 惟晉之祺 宣文惟后 克配

彼天 撫寧四海 保有康年 於乎緝熙 肆用靖

民 爰立典制 爰脩禮紀 作民之極 莫匪資始

克昌厥後 永言保之

天地郊明堂夕牲歌

皇矣有晉 時邁其德 受終于天 光濟萬國 萬

國既光 神定厥祥 虔于郊祀 祇事上皇 祇事  
上皇 百福是臻 巍巍祖考 克配彼天 嘉牲匪  
斂 德馨惟饗 受天之祜 神化四方  
天地郊明堂降神歌

於赫大晉 應天景祥 二帝邁德 宣此重光 我  
皇受命 奄有萬方 郊祀配享 禮樂孔章 神祇  
嘉享 祖考是皇 克昌厥後 保祚無疆

天郊饗神歌

整泰壇 禮皇神 精氣感 百靈賓 蘊朱火 燎

芳薪 紫烟遊 冠青雲 神之體 靡象形 曠無

方 幽以清 神之來 光景昭 聽無聞 視無兆

神之至 舉歆歆 靈爽協 動余心 神之坐

同歡娛 澤雲翔 化風舒 嘉樂奏 文中聲 八

音諧 神是聽 咸潔齊 並芬芳 烹牲牲 享玉

觴 神悅饗 歆禋祀 祐大晉 降繁祉 昨京邑

廣四海 保天年 窮地紀

地郊饗神歌

整泰圻 埃皇祇 衆神感 羣靈儀 陰祀設 吉

禮施 夜將極 時未移 祇之體 無形象 潛泰

幽 洞忽荒 祇之出 夢若有 靈無遠 天下毋

祇之來 遺光景 昭若存 終冥冥 祇之至

舉欣欣 舞象德 歌成文 祇之坐 同歡豫 澤

雨施 化雲布 樂八變 聲教敷 物咸亨 祇是

娛 齊既絜 侍者肅 玉觴進 咸穆穆 饗嘉泰

歆德馨 祚有晉 暨羣生 溢九壤 格天庭

保萬壽 延億齡

明堂饗神歌

經始明堂 享祀匪懈 於皇烈考 光配上帝 赫

赫上帝 既高既崇 聖考是配 明德顯融 率土

敬職 萬方來祭 常于時假 保祚永世

祠廟夕牲歌

我夕我牲 猗歟敬止 嘉泰孔時 供茲享祀 神

鑒厥誠 博碩斯歆 祖考降饗 以虞孝孫之心

祠廟迎送神歌

嗚呼悠哉 日監在茲 以時享祀 神明降之 神

明斯降 既祐饗之 祚我無疆 受天之祐 赫赫

太上 巍巍聖祖 明明烈考 丕承繼序

祠征西將軍登歌

經始宗廟 神明戾止 申錫無疆 祇承享祀 假

哉皇祖 綏予孫子 燕及後昆 錫茲繁祉

祠豫章府君登歌

嘉樂肆筵 薦祀在堂 皇皇宗廟 乃祖乃皇 濟

濟辟公 相予烝嘗 享祀不忒 降福穰穰

祠潁川府君登歌

於邈先后 實司于天 顯矣皇祖 帝祉肇臻 本

支克昌 資始開元 惠我無疆 享祚永年

祠京兆府君登歌

於惟曾皇 顯顯令德 高明清亮 匪競柔克 保

又命祐 基命惟則 篤生聖祖 光濟四國

祠宣皇帝登歌

於鑠皇祖 聖德欽明 勤施四方 夙夜敬止 載

敷文教 載揚武烈 匡定社稷 龔行天罰 經始

大業 造創帝基 畏天之命 于時保之

祠景皇帝登歌

執競景皇 克明克哲 旁作穆穆 惟祗惟畏 纂

宣之緒 耆定厥功 登此雋乂 糾彼羣凶 業業

在位 帝既勤止 惟天之命 於穆不已

祠文皇帝登歌

於皇時晉 允文文皇 聰明睿智 聖敬神武 萬

幾莫綜 皇斯清之 蛇豕放命 皇斯平之 柔遠

能邇 簡授英賢 創業垂統 勲格皇天

祠廟饗神歌二篇

曰晉是常 享祀時序 宗廟致敬 禮樂具舉 惟

其來祭 普天率土 犧罇既奠 清酌既載 亦有

和羹 薦羞斯備 蒸蒸永慕 感時興思 登歌奏  
舞 神樂其和 祖考來格 祐我邦家 溥天之下  
罔不休嘉

肅肅在位 濟濟臣工 四海來格 禮儀有容 鐘  
鼓振 管絃理 舞開元 歌永始 神胥樂兮 肅  
肅在位 臣工濟濟 小大咸敬 上下有禮 理管  
絃 振鼓鐘 舞象德 歌詠功 神胥樂兮 肅肅  
在位 有來雍雍 穆穆天子 相維辟公 禮有儀

樂有則 舞象功 歌詠德 神胥樂兮

杜夔傳舊雅樂四曲一曰鹿鳴二曰騶虞三曰伐檀四  
曰文王皆古聲辭及太和中左延年改變騶虞伐檀文  
王三曲更自作聲節其名雖存而聲實異唯因夔鹿鳴  
全不改易每正旦大會太尉奉璧羣后行禮東廂雅樂  
常作者是也後又改三篇之行禮詩第一曰於赫篇詠  
武帝聲節與古鹿鳴同第二曰巍巍篇詠文帝用延年  
所改騶虞聲第三曰洋洋篇詠明帝用延年所改文王

聲第四曰復用鹿鳴鹿鳴之聲重用而除古伐檀及晉  
初食舉亦用鹿鳴至泰始五年尚書奏使太僕傅玄中  
書監荀勗黃門侍郎張華各造正旦行禮及王公上壽  
酒食舉樂歌詩荀勗云魏氏行禮食舉再取周詩鹿鳴  
以爲樂章又鹿鳴以宴嘉賓無取於朝考之舊聞未知  
所應勗乃除鹿鳴舊歌更作行禮詩四篇先陳三朝朝  
宗之義又爲正旦大會王公上壽歌詩并食舉樂歌詩  
合十三篇又以魏氏歌詩或二言或三言或四言或五

言與古詩不類以問司律中郎將陳頎頎曰被之金石  
未必皆當故勗造晉歌皆爲四言唯王公上壽酒一篇  
爲三言五言焉張華以爲魏上壽食舉詩及漢氏所施  
用其文句長短不齊未皆合古蓋以依詠弦節本有因  
循而識樂知音足以制聲度曲法用率非凡近之所能  
改二代三京襲而不變雖詩章辭異廢興隨時至其韻  
逗留曲折皆繫於舊有由然也是以一皆因就不敢有  
所改易此則華勗所明異旨也時詔又使中書侍郎成

公綏亦作焉今並採列之云

四廂樂歌

正旦大會行禮歌

成公綏

穆穆天子 光臨萬國 多士盈朝 莫匪俊德 流

化罔極 王猷允塞 嘉會置酒 嘉賓充庭 羽旄

曜宸極 鐘鼓振太清 百辟朝三朝 或或明儀形

濟濟鏘鏘 金聲玉振

禮樂具 宴嘉賓 眉壽祚聖皇 景福惟日新 羣

后戾止 有來雍雍 獻酬納贄 崇此禮容 豐羞

萬俎 旨酒千鍾 嘉樂盡宴樂 福祿咸攸同

樂哉天下安寧 道化行 風俗清 簫韶作 詠九

成 年豐穰 世泰平 至治哉 樂無窮 元首聰

明 股肱忠 澍豐澤 揚清風

嘉瑞出 靈應彰 麒麟見 鳳凰翔 醴泉湧 流

中唐 嘉禾生 穗盈箱 降繁祉 祚聖皇 承天

位 統萬國 受命應期 授聖德

四世重光 宣開洪業 景克昌 文欽明 德彌彰  
肇啓晉邦 流祚無疆

秦始建元 鳳皇龍興 龍興伊何 享祚萬乘 奄  
有八荒 化育黎蒸 圖書既煥 金石有徵 德光  
大道熙隆 被四表 格皇穹 奕奕萬嗣 明明  
顯融 高朗令終 保茲永祚 與天比崇  
聖皇君四海 順人應天期 三葉合重光 秦始開  
洪基 明曜參日月 功化侔四時 宇宙清且泰

黎庶咸雍熙 善哉雍熙

惟天降命 翼仁祐聖 於穆三皇 載德彌盛 摠

齊璇璣 光統七政 百揆時序 化若神聖 四海

同風 興至仁 濟民育物 擬陶均 擬陶均 垂

惠潤 皇皇羣賢 峨峨英雋 德化宣 芬芳播來

膺 播來膺 垂後昆 清廟何穆穆 皇極闢四門

皇極闢四門 萬機無不綜 亶亶翼翼 樂不及

荒 飢不遑食 大禮既行 樂無極

登崑崙 上層城 乘飛龍 升泰清 冠日月 佩

五星 揚虹蜺 建篋旌 披慶雲 蔭繁榮 覽八

極 遊天庭 順天地 和陰陽 序四時 曜三光

張帝紀 正皇綱 播仁風 流惠康 邁洪化

振靈威 懷萬方 納九夷 朝閭闔 宴紫微 建

五旗 羅鐘簏 列四懸 奏韶武 鏗金石 揚旌

羽 縱八佾 巴渝舞 詠雅頌 和律呂 于胥樂

樂聖主

化蕩蕩 清風泄 摠英雄 御俊傑 開宇宙 掃  
四裔 光緝熙 美聖哲 超百代 揚休烈 流景  
祚 顯萬世

皇皇顯祖 翼世佐時 寧濟六合 受命應期 神

武鷹揚 大化成熙 廓開皇衢 用成帝基

光光景皇 無競惟烈 匡時拯俗 休功盖世 宇

宙既康 九域有截 天命降監 啓祚明哲

穆穆烈考 克明克儁 實天生德 誕應靈運 肇

建帝業 開國有晉 載德奕世 垂慶洪肩

明明聖帝 龍飛在天 與靈合契 通德幽玄 仰

化青雲 俯育重川 受靈之祐 於萬斯年

正旦大會王公上壽酒歌

荀勗

踐元辰 延顯融 獻羽觴 祈令終 我皇壽而隆

我皇茂而嵩 本支奮百世 休祚鍾聖躬

食舉樂東西廂歌

荀勗

煌煌七曜 重明交暢 我有嘉賓 是應是貺 邦

政既圖 接以大饗 人之好我 式遵德讓

賓之初筵 藹藹濟濟 既朝乃宴 以洽百禮 頌

以位敘 或庭或陞 登儉台叟 亦有兄弟 胥子

陪寮 憲茲度楛 觀頤養正 降福孔偕

昔我三后 大業是維 今我聖皇 焜燿前暉 奕

世重規 明照九畿 思輯用光 時罔有違 陟禹

之跡 莫不來威 天被顯祿 福履是綏

赫矣太祖 克廣明德 廓開宇宙 正世立則 變

化不經 民無瑕慝 創業垂統 兆我晉國

烈文伯考 時維帝景 夷險平亂 威而不猛 御

衡不迷 皇塗煥景 七德咸宣 其寧惟永

猗歟盛歟 先皇聖文 則天作孚 大哉為君 慎

徽五典 帝載是勤 文武發揮 茂建嘉勳 脩己

濟治 民用寧殷 懷遠燭幽 玄教氤氳 善世不

伐 服事三分 德博化隆 道冒無垠

隆化洋洋 帝命溥將 登我晉道 越惟聖王 龍

飛革運 臨燾八荒 睿喆欽明 配蹤虞唐 封建

厥福 駿發其祥 三朝習吉 終然允臧 其臧維

何 摠彼萬方 元侯列辟 四嶽藩王 時見世享

率茲有常 旅揖在庭 嘉客在堂 宋衛既臻

陳留山陽 有賓有使 觀國之光 貢賢納計 獻

璧奉璋 保佑命之 申錫無疆

振鷺于飛 鴻漸其翼 京邑穆穆 四方是式 無

競維人 王綱允勅 君子來朝 言觀其極

虞虞大君 民之攸暨 信理天工 惠康不匱 將

遠不仁 訓以醇粹 幽明有倫 俊乂在位 九族

既睦 庶邦順比 開元布憲 四海鱗萃 協時正

統 殊塗同致 厚德載物 靈心隆貴 敷奏讜言

納以無諱 樹之典象 誨之義類 上教如風

下應如卉 一人有慶 羣萌以遂 我后宴喜 令

問不墜

既宴既喜 翕是萬邦 禮儀卒度 物其有容 哲

哲庭燎 嚶嚶鼓鐘 笙磬詠德 萬舞象功 八音

克諧 俗易化從 其和如樂 庶品時邕

時邕斌斌 六合同塵 往我祖宣 威靜殊鄰 首

定荆楚 遂平燕秦 疊疊文皇 邁德流仁 爰造

草昧 應乾順民 靈瑞告符 休徵響震 天地弗

違 以和神人 既禽庸蜀 吳會是賓 肅慎率職

楛矢來陳 韓濊進樂 宮徵清鈞 西旅獻葵

扶南效珍 蠻裔重譯 玄齒文身 我皇撫之 景

命惟新

悃悃嘉會 有聞無聲 清醑既奠 籩豆既升 禮

充樂備 簫韶九成 愜樂飲酒 酣而不盈 率土

歡豫 邦國以寧 王猷允塞 萬載無傾

冬至初歲小會歌

張華

日月不留 四氣回周 節慶代序 萬國同休 庶

允羣后 奉壽升朝 我有壽禮 式宴百僚 繁肴

綺錯 旨酒泉淳 笙鏞和奏 磬管流聲 上隆其

愛下盡其心 宣其壅滯 訓之德音 乃宣乃訓  
配享交泰 永載仁風 長撫無外

宴會歌

張華

亶亶我皇 配天垂光 留精日昃 經覽無方 聽  
朝有暇 延命衆臣 冠蓋雲集 樽俎星陳 肴烝  
多品 八珍代變 羽爵無算 究樂極宴 歌者流  
聲 舞者投袂 動容有節 絲竹並設 宣揚四體  
繁手趣摯 懽足發和 酣不忘禮 好樂無荒

翼翼濟濟

命將出征歌

張華

重華隆帝道 戎蠻或不賓 徐夷興有周 鬼方亦

違殷 今在盛明世 寇虐動四垠 豺狼染牙爪

羣生號穹旻 元帥統方夏 出車撫涼秦 衆貞必

以律 臧否實在人 威信加殊類 踈逖思自親

單醪豈有味 挾纊感至仁 武功尚止戈 七德美

安民 遠跡由斯舉 永世無風塵

勞還師歌 張華

獯狁背天德 搆亂擾邦畿  
戎車震朔野 羣帥贊  
皇威 將士齊心旅  
感義忘其私 積勢如鞞弩  
赴節如發機 囂聲動山谷  
金光曜素暉 揮戈陵  
勁敵 武步蹈橫屍  
鯨鯢皆授首 北土永清夷  
昔往冒隆暑 今來白雪霏  
征夫信勤瘁 自古詠  
采薇 收榮於舍爵  
燕喜在凱歸

中宮所歌 張華

先王統大業 玄化漸八維 儀刑乎萬邦 內訓隆

壺闈 皇英垂帝典 大雅詠三妃 執德宣隆教

正位理厥機 含章體柔順 帥禮蹈謙祗 螽斯弘

慈惠 樛木逮幽微 徽音穆清風 高義邈不追

遺榮叅日月 百世仰餘暉

宗親會歌 張華

族燕明禮順 餼食序親親 骨肉散不殊 昆弟豈

他人 本支篤同慶 棠棣著先民 於皇聖明后

天覆弘且仁 降禮崇親戚 旁施協族姻 式宴盡  
酣娛 飲御備羞珍 和樂既宣洽 上下同懽欣  
德教加四海 敦睦被無垠

泰始九年光祿大夫荀勗以杜夔所制律呂校太樂摠  
章鼓吹八音與律呂乖錯乃制古尺作新律呂以調聲  
韻事具律歷志律成遂班下太常使太樂摠章鼓吹清  
商施用勗遂典知樂事啟朝士解音律者共掌之使郭  
瓊宋識等造正德大豫二舞其樂章亦張華之所作云

正德舞歌

張華

曰皇上天

玄鑒惟光

神器周回

五德代章

祚

命于晉

世有拓王

弘濟區夏

陶甄萬方

大明

垂曜

旁燭無疆

蚩蚩庶類

風德永康

皇道惟

清

禮樂斯經

金石在懸

萬舞在庭

象容表慶

協律被聲

軼武超邁

取節六英

同進退讓

化漸無形

太和宣洽

通於幽冥

大豫舞歌

張華

惟天之命 符運有歸 赫赫大晉 三后重暉 繼  
明紹世 光撫九圍 我皇紹期 遂在璇璣 羣生  
屬命 奄有庶邦 慎徽五典 玄教遐通 萬方同  
軌 率土咸雍 爰制大豫 宣德舞功 醇化既穆  
王道協隆 仁及草木 惠加昆蟲 億兆夷人  
悅仰皇風 丕顯大業 永世彌崇

荀勗又作新律笛十二枚以調律呂正雅樂正會殿庭  
作之自謂宮商克諧然論者猶謂勗暗解時阮咸妙達

八音論者謂之神解咸常心譏勗新律聲高以爲高近  
哀思不合中和每公會樂作勗意咸謂之不調以爲異  
已乃出咸爲始平相後有田父耕於野得周時玉尺勗  
以校已所治鐘鼓金石絲竹皆短校一米於此伏咸之  
妙復徵咸歸勗既以新律造二舞次更脩正鐘聲會勗  
薨未竟其業元康三年詔其子藩脩定金石以施郊廟  
尋值喪亂莫有記之者

漢高祖自蜀漢將定三秦閭中范因率賓人以從帝爲

前鋒及定秦中封因爲閬中侯復賓人七姓其俗喜舞  
高祖樂其猛銳數觀其舞後使樂人習之閬中有渝水  
因其所居故名曰巴渝舞舞曲有矛渝本歌曲安弩渝  
本歌曲安臺本歌曲行辭本歌曲摠四篇其辭既古莫  
能曉其句度魏初乃使軍謀祭酒王粲改創其辭粲問  
巴渝帥李管种玉歌曲意試使歌聽之以考校歌曲而  
爲之改爲矛渝新福歌曲弩渝新福歌曲安臺新福歌  
曲行辭新福歌曲行辭以述魏德黃初三年又改巴渝

舞曰昭武舞至景初元年尚書奏考覽三代禮樂遺曲  
據功象德奏作武始咸熙章斌三舞皆執羽籥及晉又  
改昭武舞曰宣武舞羽籥舞曰宣文舞咸寧元年詔定  
祖宗之號而廟樂乃停宣武宣文二舞而同用荀勗所  
使郭瓊宋識等所造正德大豫二舞云

晉書卷二十二

謹案卷二十一第十一頁前二行今陛下功高皇  
王德無與二刊本脫王字及與字據毛本增

第十八頁後一行太康四年六年按毛本小注云  
一無六年二字

卷二十二第十二頁後一行薦羞斯備刊本訛作  
薦斯羞備據毛本改





總校官庶吉士臣張能照

校對官檢討臣王坦修

謄錄貢生臣王詢

欽定四庫全書薈要

史部

晉書卷二十三  
四

詳校官內閣侍讀孫球



欽定四庫全書蒼要卷四十五十二

史部

晉書卷二十三

唐太宗文皇帝御撰

第十三

樂下

永嘉之亂海內分崩伶官樂器皆沒於劉石江左初立宗廟尚書下太常祭祀所用樂名太常賀循答云魏氏增損漢樂以爲一代之禮未審大晉樂名所以爲異遭

離喪亂舊典不存然此諸樂皆和之以鐘律文之以五  
聲詠之以歌辭陳之於舞列宮懸在庭琴瑟在堂八音  
迭奏雅樂並作登歌下管各有常詠周人之舊也自漢  
氏以來依倣此禮自造新詩而已舊京荒廢今既散亡  
音韻曲折又無識者則於今難以意言于時以無雅樂  
器及伶人省大樂并鼓吹令是後頗得登歌食舉之樂  
猶有未備太寧末明帝又訪阮孚等增益之咸和中成  
帝乃復置太樂官鳩集遺逸而尚未有金石也庾亮爲

荊州與謝尚脩復雅樂未具而亮薨庾翼桓溫專事軍  
旅樂器在庫遂至朽壞焉及慕容儼平冉閔兵戈之際  
而鄴下樂人亦頗有來者永和十一年謝尚鎮壽陽於  
是採拾樂人以備大樂并制石磬雅樂始頗具而王猛  
平鄴慕容氏所得樂聲又入關右太元中破苻堅又獲  
其樂工揚蜀等閑習舊樂於是四廂金石始備焉乃使  
曹毗王珣等增造宗廟歌詩然郊祀遂不設樂今列其  
詞於後云

歌宣帝

曹毗

於赫高祖

德協靈符

應運撥亂

釐整天衢

勲格宇宙

化動八區

肅以典刑

陶以玄珠

神石吐瑞

靈芝自敷

肇基天命

道均唐虞

歌景帝

曹毗

景皇承運

纂隆洪緒

皇羅重抗

天暉再舉

蠢矣二寇

擾我揚楚

乃整元戎

以膏齊斧

疊疊神算

赫赫王旅

鯨鯢既平

功冠帝宇

歌文帝 曹毗

太祖齊聖 王猷誕融 仁教四塞 天基累崇

皇室多難 嚴清紫宮 威厲秋霜 惠過春風

平蜀夷楚 以文以戎 奄有參墟 聲流無窮

歌武帝 曹毗

於穆武皇 允龔欽明 應期登禪 龍飛紫庭

百揆時序 聽斷以情 殊域既賓 僞吳亦平

晨流甘露 宵應朗星 野有擊壤 路垂頌聲

歌元帝 曹毗

運屯百六 天羅解貫 元皇勃興 網籠江漢

仰齊七政 俯平禍亂 化若風行 澤猶雨散

淪光更曜 金輝復煥 德冠千載 蔚有餘榮

歌明帝 曹毗

明明肅祖 闡弘帝祚 英風夙發 清暉載路

姦逆縱恣 罔式皇度 躬振朱旗 遂豁天步

宏猷允塞 高羅雲布 品物咸寧 洪基永固

歌成帝 曹毗

於休顯宗 道澤玄播 式宣德音 暢物以和

邁德蹈仁 匪禮不過 敷以純風 濯以清波

連理映阜 鳴鳳棲柯 同規放勛 義蓋山河

歌康帝 曹毗

康皇穆穆 仰嗣洪德 爲而不宰 雅音四塞

閑邪以誠 鎮物以默 威靜區宇 道宣邦國

歌穆帝 曹毗

孝宗夙哲 休音久臧 如彼晨離 耀景扶桑

垂訓華幄 流潤八荒 幽贊玄妙 爰該典章

西平僭蜀 北靜舊疆 高猷遠暢 朝有遺芳

歌哀帝

曹毗

於穆哀皇 聖心虛遠 雅好玄古 大庭是踐

道尚無爲 治存易簡 化若風行 時猶草偃

雖曰登遐 徽音彌闡 愔愔雲韶 盡美盡善

歌簡文帝

王珣

皇矣簡文 於昭于天 靈明若神 周淡如川

沖應其來 實與其遷 亶亶心化 日用不言

易而有親 簡而可傳 觀流彌遠 求本踰玄

歌孝武帝

王珣

天監有晉 欽哉烈宗 同規文考 玄默允恭

威而不猛 約而能通 神鉦一震 九域來同

道積淮海 雅頌自東 氣陶醇露 化協時雍

四時祠祀

曹毗

肅肅清廟 巍巍聖功 萬國來賓 禮儀有容

鐘鼓振 金石熙 宣兆祚 武開基

神斯樂兮 理管絃 有來斯和 說功德

吐清歌 神斯樂兮 洋洋玄化 潤被九壤

民無不說 道無不往 禮有容 樂有式

詠九功 永無極 神斯樂兮

漢時有短簫饒歌之樂其曲有 朱鷺 思悲翁

艾如張 上之回 雍離 戰城南 巫山高

將進酒 君馬黃 上陵 有所思 雉子班

聖人出 芳樹 上邪 臨高臺 遠如期

石留 務成 玄雲 黃爵行 釣竿等曲列

於鼓吹多序戰陣之事及魏受命改其十二曲使繆襲  
爲詞述以功德代漢改朱鷺爲楚之平言魏也改思悲  
翁爲戰榮陽言曹公也改艾如張爲獲呂布言曹公東  
圍臨淮擒呂布也改上之回爲克官渡言曹公與袁紹  
戰破之於官渡也改雍離爲舊邦言曹公勝袁紹於官

渡還譙收藏死亡士卒也改戰城南爲定武功言曹公  
初破鄴武功之定始乎此也改巫山高爲屠柳城言曹  
公越北塞歷白檀破三郡烏桓於柳城也改上陵爲平  
南荆言曹公平荆州也改將進酒爲平關中言曹公征  
馬超定關中也改有所思爲應帝期言文帝以聖德受  
命應運期也改芳樹爲邕熙言魏氏臨其國君臣邕穆  
庶績咸熙也改上邠爲太和言明帝繼體承統太和改  
元德澤流布也其餘並同舊名是時吳亦使韋昭製十

二曲名以述功德受命改朱鷺爲炎精缺言漢室衰孫  
堅奮迅猛志念在匡救王迹始乎此也改思悲翁爲漢  
之季言堅悼漢之微痛董卓之亂興兵奮擊功蓋海內  
也改艾如張爲攄武師言權卒父之業而征伐也改上  
之回爲烏林言魏武既破荊州順流東下欲來爭鋒權  
命將周瑜逆擊之於烏林而破走也改雍離爲秋風言  
權悅以使人人忘其死也改戰城南爲克皖城言魏武  
志圖并兼而權親征破之於皖也改巫山高爲關背德

言蜀將關羽背棄吳德權引師浮江而擒之也改上陵  
曲爲通荊州言權與蜀交好齊盟中有關羽自失之懋  
終復初好也改將進酒爲章洪德言權章其大德而遠  
方來附也改有所思爲順歷數言權順籙圖之符而建  
大號也改芳樹爲承天命言其時主聖德踐位道化至  
盛也改上邪曲爲玄化言其時主脩文武則天而行仁  
澤流洽天下喜樂也其餘亦用舊名不改及武帝受禪  
乃令傳玄製爲二十二篇亦述以功德代魏改朱鷺爲

靈之祥言宣帝之佐魏猶虞舜之事堯既有石瑞之徵  
又能用武以誅孟達之逆命也改思悲翁爲宣受命言  
宣帝禦諸葛亮養威重運神兵亮震怖而死也改艾如  
張爲征遼東言宣帝陵大海之表討滅公孫氏而梟其  
首也改上之回爲宣輔政言宣帝聖道深遠撥亂反正  
網羅文武之才以定二儀之序也改雍離爲時運多難  
言宣帝致討吳方有征無戰也改戰城南爲景龍飛言  
景帝克明威教賞順夷逆隆無疆崇洪基也改巫山高

爲平玉衡言景帝一萬國之殊風齊四海之乖心禮賢  
養士而纂洪業也改上陵爲文皇統百揆言文帝始統  
百揆用人有序以敷太平之化也改將進酒爲因時運  
言因時運變聖謀潛施解長蛇之交離羣桀之黨以武  
濟文以邁其德也改有所思爲惟庸蜀言文帝既平萬  
乘之蜀封建萬國復五等之爵也改芳樹爲天序言聖  
皇應歷受禪弘濟大化用人各盡其才也改上邪爲大  
晉承運期言聖皇應籙受圖化象神明也改君馬黃爲

金靈運言聖皇踐祚致敬宗廟而孝道行於天下也改雉子班爲於穆我皇言聖皇受禪德合神明也改聖人出爲仲春振旅言大晉申文武之教畋獵以時也改臨高臺爲夏苗田言大晉畋狩順時爲苗除害也改遠如期爲仲秋獮田言大晉雖有文德不廢武事順時以殺伐也改石留爲順天道言仲冬大閱用武脩文大晉之德配天也改務成爲唐堯言聖皇陟帝位德化光四表也玄雲依舊名言聖皇用人各盡其材也改黃爵行爲

伯益言赤鳥銜書有周以興今聖皇受命神雀來也鈞  
竿依舊名言聖皇德配堯舜又有呂望之佐濟大功效  
太平也其辭並列之於後云

靈之祥

靈之祥

石瑞章

旌金德

出西方

天降命

授宣皇

應期運

時龍驤

繼大舜

佐陶唐

贊文武

建帝綱

孟氏叛

據南疆

追有扈

亂五常

吳寇叛

蜀虜彊

交誓盟

連遐荒

宣赫怒 奮鷹揚 震乾威 曜電光 陵九天

陷石城 梟逆命 拯有生 萬國安 四海寧

宣受命

應天機 風雲時動 神龍飛 禦葛亮

鎮雍梁 邊境安 夷夏康 務節事 勤定傾

攬英雄 保持盈 深穆穆 赫明明 沖而泰

天之經 養威重 運神兵 亮乃震斃 天下安寧

征遼東

征遼東 敵失據 威靈邁日域 公孫既授首

羣逆破膽 咸震怖 朔北響應 海表景附

武功赫赫 德雲布

宣輔政

宣皇輔政 聖烈深 撥亂反正 順天心

網羅文武才 慎厥所生 所生賢 遺教施

安上治民 化風移 肇創帝基 洪業垂

於鑠明明 時赫戲 功濟萬世 定二儀

定二儀  
雲行雨施  
海外風馳

時運多難

時運多難  
道教痛  
天地變化  
有盈虛

蠢爾吳蠻  
武視江湖  
我皇赫斯  
致天誅

有征無戰  
弭其圖  
天威橫被  
廓東隅

景龍飛

景龍飛  
御天威  
聰鑒玄察  
動與神明協機

從之者顯  
逆之者滅夷  
文教敷  
武功巍

普被四海 萬邦望風 莫不來綏 聖德潛斷

先天弗違 弗違祥 享世永長 猛以致寬

道化光 赫明明 祚隆無疆 帝績惟期

有命既集 崇此洪基

平玉衡

糾姦回 萬國殊風 四海乖

禮賢養士 羈御英雄 思心齊 纂戎洪業

崇皇階 品物咸亨 聖敬日躋 聰鑒盡下情

明明綜天機

文皇統百揆

文皇統百揆

繼天理萬方

武將鎮四隅

英佐盈朝堂

謀言協秋蘭

清風發其芳

洪澤所漸潤

礫石爲珪璋

大道侔五帝

盛德踰三王

咸光大

上參天與地

至化無內外

無內外

六合並康乂

並康乂

講茲嘉會

在昔羲與農

大晉德斯邁

鎮征及諸州

爲藩衛

功濟四海

洪烈流萬世

因時運

因時運

聖策施

長蛇交解

羣桀離

勢窮奔吳

獸騎厲

惟武進

審大計

時邁其德

清一世

惟庸蜀

惟庸蜀

僭號天一隅

劉備逆帝命

禪亮承其餘

擁衆數十萬

闕隙乘我虛

驛騎進羽檄

天下不遑居

姜維屢寇邊

隴土爲荒蕪

文皇愍斯民

歷世受罪辜

外謨藩屏臣

內謨衆士夫

爪牙應指受

腹心獻良圖

良圖協成文

大興百萬軍

雷鼓震地起

猛勢陵浮雲

逋虜畏天誅

面縛造壘門

萬里同風教

逆命稱妾臣

光建五等

紀綱天人

天序

天序

應歷受禪

承靈祐

御羣龍

勒螭武 弘濟大化 英雋作輔 明明統萬機

赫赫鎮四方 咎繇稷契之疇協蘭芳

禮王臣 覆兆民 化之如天與地

誰敢愛其身

大晉承運期

大晉承運期 德隆聖皇 時清晏 白日垂光

應籙圖 陟帝位 繼天正玉衡 化行象神明 至

哉道隆虞與唐 元首敷洪化 百僚股肱並忠良

時太康

隆隆赫赫

福祚盈無疆

金靈運

金靈運

天符發

聖徵見

參日月

惟我皇

體神聖

受魏禪

應天命

皇之興

靈有徵

登大麓

御萬乘

皇之輔

若闡武

爪牙奮

莫之禦

皇之佐

贊清化

百事理

萬邦賀

神祇應

嘉瑞章

恭享禮

薦先皇

樂時奏

磬管鏘

鼓殷殷

鐘鏗鏗

奠樽俎

實玉觴

神歆饗

咸悅康

宴孫子

祐無疆

大孝蒸蒸

德教被萬方

於穆我皇

於穆我皇

盛德聖且明

受禪君世

光濟羣生

普天率土

莫不來庭

顒顒六合內

望風仰泰清

萬國雍雍

興頌聲

大化洽

地平而天成

七政齊

玉衡惟平

峨峨佐命

濟濟羣英

夙夜乾乾

萬機是經

雖治興

匪荒寧

謙道光

冲不盈

天地合德

日月同榮

赫赫煌煌

曜幽冥

三光克從

於顯天垂景星

龍鳳臻

甘露宵零

肅神祇

祇上靈

萬物欣戴

自天效其成

仲春振旅

仲春振旅

大致人

武教於時日新

師執提

工執鼓

坐作起

節有序

盛矣允文允武

蒐田表禡 申法誓

遂圍禁

獻社祭

允以時明國制

文武並用禮之經

列車如戰大教明

古今誰能去兵

大晉繼天濟羣生

夏苗田

夏苗田

運將徂

軍國異容

文武殊

乃命羣吏

撰車徒

辯其號名

讚契書

王軍啓八門

行同上帝居

時路建大麾

雲旗翳

紫虛

百官象其事

疾則疾

徐則徐

回衡旋軫

罷陣斨車

獻禽享祀

蒸蒸配有虞

惟大晉德參兩儀

化雲敷

仲秋彌田

仲秋彌田

金德常綱

涼風清且厲

凝露結爲霜

白藏司辰

倉隼時鷹揚

鷹揚猶尚父

順天以殺伐

春秋時序

雷霆振威曜

進退由鈺鼓

致禽祀禘

羽毛之用充軍府

赫赫大晉德

芬烈陵三五

敷化以文

雖安不廢武

光宅四海

永享天之祐

順天道

順天道

握神契

三時示講武事

冬大閱

鳴鐃振鼓鐸

旌旗象虹霓

文制其中

武不窮武

動軍誓衆

禮成而義舉

三驅以崇仁

進止不失其序

兵卒練

將如闕武

惟闕

武氣陵青雲

解圍三面

殺不殄羣

偃旌麾

班六軍

獻享烝

修典文

嘉大晉

德

配天

祿報功

爵俟賢

響燕樂

受茲

百祿

壽萬年

唐堯

唐堯諮務成

謙謙德其興

積漸終光大

履霜致堅冰

神明道自成

河海猶可凝

舜禹統百揆

元凱以次升

禪讓應大歷

睿聖世相承

我皇陟帝位

平衡正準繩

德化飛四表

祥氣見其徵

興王坐俟旦

亡主恬自矜

致遠由近始

覆篲成山陵

披圖按先籍

有其證靈液

玄雲

玄雲起丘山

祥氣萬里會

龍飛何蜿蜿

鳳翔何翩翩

昔在唐虞朝

時見青雲際

今親遊萬國

流光溢天外

鶴鳴在後園

清音隨風邁

成湯隆顯命

伊摯來如飛

周文獵渭濱

遂載呂望歸

符合如影響

先天天不違

輟耕綜地綱

解褐袷天維

元功配二王

芬馨世所稀

我皇叙羣才

洪烈何巍巍

桓桓征四表

濟濟理萬機

神化感無方

髦才盈帝畿

丕顯惟昧旦

日新孔所諮

茂哉明聖德

日月同光輝

伯益

伯益佐舜禹

職掌山與川

德侔十六相

思心入無間

智理周萬物

下知衆鳥言

黃雀應清化

翔習何翩翩

和鳴棲庭樹

徘徊雲日間

夏桀爲無道

密網施山河

酷祝振纖網

當奈黃雀何

殷湯崇天德

去其三面羅

逍遙羣飛來

鳴聲乃復和

朱雀作南宿

鳳皇統羽羣

赤鳥銜書至

天命瑞周文

神雀今來遊

爲我受命君

嘉祥致天和

膏澤隆青雲

蘭風發芳氣

蓋世同其芬

釣竿

釣竿何冉冉

甘餌芳且鮮

臨川運思心

微綸沈九泉

太公寶此術

乃在靈祕篇

機變隨物移

精妙貫未然

遊魚驚著釣

潛龍飛戾天

戾天安所至

撫翼翔太清

太清一何異

兩儀出渾成

玉衡正三辰

造化賦羣形

退願輔聖君

與神合其靈

我君弘遠略

天人不足并

天人初并時

昧昧何芒芒

日月有徵兆

文象興二皇

蚩尤亂生靈

黃帝用兵征萬方

逮夏禹而德衰

三世不及虞與唐

我皇盛德配堯舜

受禪即祚享

天祥 率土蒙祐

靡不肅 庶事康

庶事康

穆穆明明 荷百祿

保無極 永太平

輦舞未詳所起然漢代已施於燕享矣傅毅張衡所賦皆其事也舊曲有五篇一關東有賢女二章和二年中

三樂久長四方皇五殿前生桂樹其辭並亡曹植鞞舞詩序云故漢靈帝西園鼓吹有李堅者能鞞舞遭世荒亂堅播越關西隨將軍段煨先帝聞其舊伎下書召堅堅年踰七十中間廢而不爲又古曲甚多謬誤異代之文未必相襲故依前曲作新歌五篇及秦始皇中又製其辭焉其舞故常二八桓玄將僭位尚書殿中郎袁明子啓增滿八佾秦始皇中歌辭今列之後云

鞞舞歌詩五篇

洪業篇

當魏曲明明魏皇帝古曲關中有賢女

宣文創洪業 盛德在泰始 聖皇應靈符 受命君

四海 萬國何所樂 上有明天子 唐堯禪帝位

虞舜惟恭己 恭己正南面 道化與時移 大赦盪

萌漸 文教被黃支 象天則地 體無爲 聰明配

日月 神聖參兩儀 雖有三凶類 靜言無所施

象天則地 體無爲 稷契並佐命 伊呂升王臣

蘭芷登朝肆 下無失宿人

聲發響自應

表立景來附

哮闕順羈制

潛龍升天路

備物立成器

變通極其數

百事以時敘

萬機有常度

訓之以克讓

納之以忠恕

羣下仰清風

海外同懽慕

象天則地

化雲布

昔日貴彫飾

今尚儉與素

昔日多纖介

今去情與故

象天則地

化雲布

濟濟大朝士

夙夜綜萬機

萬機無廢理

明明降訓詔

臣譬列星景

君配朝日輝

事業並通濟

功烈何巍巍

五帝繼三皇

三皇世所歸

聖德應期運

天地不能違

仰之彌已高

猶天不可階

將復御龍氏

鳳皇在庭棲

天命篇

當魏曲太和有聖帝古曲章和二年中

聖祖受天命

應期輔魏皇

入則綰萬機

出則征

四方 朝廷無遺理

方表寧且康

道隆舜臣堯

積德踰太王

孟度阻窮險

造亂天一隅

神兵出

不意 奉命致天誅 赦善罰有罪 元惡宗爲虛

威風振勁蜀 武烈懾強吳 諸葛不知命 肆逆亂

天常 擁徒十餘萬 數來寇邊疆 我皇邁神武

執鉞鎮雍涼 亮乃畏天威 未戰先仆僵 盈虛自

然運 時變故多艱 東征陵海表 萬里克朝鮮

受遺齊七政 曹爽又滔天 羣凶受誅殛 百祿咸

來臻 黃華應福始 王凌爲禍先

景皇篇

當魏曲魏歷長古曲樂久長

景皇帝 聰明命世生 盛德參天地 帝王道大

創基既已難 繼世亦未易 外有夏侯玄 內則張

與李 三凶構逆亂帝紀 順天行誅 窮其姦宄

邊將禦其漸 潛謀不得起 罪人咸伏辜 威風振

萬里 平衡綜萬機 萬機無不理 召陵恒不君

內外何紛紛 衆小便成羣 蒙昧恣心 治亂不分

叡聖獨斷 濟武常以文 順天惟廢立 掃霓披

浮雲 雲霓既已闕 清和未幾聞 羽檄首尾至

變起東南藩 儉欽爲長虵 外則憑吳蠻 萬國紛

騷擾 戚戚天下懼不安 神武御六軍 我皇執鉞

征 儉欽起壽春 前鋒據項城 出其不意 並縱

奇兵 奇兵誠難御 廟勝實難支 兩軍不期遇

敵退計無施 豹騎惟武進 大戰沙陽陂 欽乃亡

寇走 奔虜若雲披 天因赦有罪 東土放鯨鯢

大晉篇 當魏曲天生蒸民古曲四方皇

赫赫大晉 於穆文皇 蕩蕩巍巍 道邁陶唐

世稱三皇五帝及今重其光  
九德克明 文既顯

武又彰 思弘六合 兼濟萬方 內舉元凱

朝政以綱 外簡武臣 時惟鷹揚 靡順不懷

逆命斯亡 仁配春日 威踰秋霜 濟濟多士

同茲蘭芳 唐虞至治 四凶滔天 致討儉欽

罔不肅虔 化感海內 海外來賓 獻其聲樂

並稱妾臣 西蜀猾夏 僭號方域 命將致討

委國稽服 吳人放命 馮海阻江 飛書告喻

響應來同 先王建萬國 九服爲藩衛 亡秦壞諸  
侯 序祚不二世 歷代不能復 忽踰五百歲 我  
皇邁聖德 應期創典制 分土五等 藩國正封界  
莘莘文武佐 千秋邁嘉會 洪澤溢區內 仁風翔  
海外

明君篇

當魏曲爲君既不易古曲殿前生桂樹

明君御四海 聽鑒盡物情 顧望有譴罰 竭忠身  
必榮 蘭芷出荒野 萬里升紫庭 茨草穢堂階

掃截不得生 能否莫相蒙 百官正其名 恭已慎

有為 有為無不成 闇君不自信 羣下執異端

正直羅浸潤 姦臣奪其權 雖欲盡忠誠 結舌不

敢言 結舌以何憚 盡忠為身患 清流豈不潔

飛塵濁其源 歧路令人迷 未遠勝不還 忠臣立

君朝 正色不顧身 邪正不並存 譬若胡與秦

胡秦有合時 邪正各異津 忠臣遇明君 乾乾惟

日新 羣目統在綱 衆星共北辰 設令遭闇主

斥退爲凡人 雖薄供時用 白茅猶爲珍 冰霜晝

夜結 蘭桂摧爲薪 邪臣多端變 用心何委曲

便辟順情指 動隨君所欲 偷安樂目前 不問清

與濁 積僞罔時主 養交以持祿 言行恒相違

難饜其谿谷 昧死射乾沒 覺露則滅族

拂舞出自江左 舊云吳舞檢其歌非吳辭也亦陳於殿  
庭楊泓序云自到江南見白符舞或言白鳧鳩舞云有  
此來數十年矣察其辭旨乃是吳人患孫皓虐政思屬

晉也今列之於後云

拂舞歌詩五篇

白鳩篇

翩翩白鳩 再飛再鳴 懷我君德 來集君庭

白雀呈瑞 素羽明鮮 翔庭舞翼 以應仁乾

皎皎鳴鳩 或丹或黃 樂我君惠 振羽來翔

東壁餘光 魚在江湖 惠而不費 敬我微驅

策我良駟 習我驅馳 與君周旋 樂道忘飢

我心虛靜 我志霑濡 彈琴鼓瑟 聊以自娛

陵雲登臺 浮遊太清 攀龍附鳳 自望身輕

濟濟篇

暢暢飛舞氣流芳 追念三五大綺黃

去失有時可行 去來時同此未央

時冉冉 近桑榆 但當飲酒爲歡娛

衰老逝 何有期 多憂耿耿內懷思

深池曠 魚獨希 願得黃浦衆所依

恩感人

世無比

悲歌且舞無極已

獨祿篇

獨獨祿祿

水深泥濁

泥濁尚可

水深殺我

雍雍雙鴈

遊戲田畔

我欲射鴈

念子孤散

翩翩浮萍

得風搖輕

我心何合

與之同并

空牀低幃

誰知無人

夜衣錦繡

誰別僞真

刀鳴劊中

倚牀無施

父冤不報

欲活何爲

猛獸班班

遊戲山間

獸欲噬人

不避豪賢

碣石篇

東臨碣石

以觀滄海

水何淡淡

山島竦峙

樹木叢生

百草豐茂

秋風蕭瑟

洪波涌起

日月之行

若出其中

星漢燦爛

若出其裏

幸甚至哉

歌以詠志

觀滄海

孟冬十月

北風徘徊

天氣肅清

繁霜霏霏

鷓鴣晨鳴

鴈過南飛

鷲鳥潛藏

熊羆窟棲

耨鍤停置

農收積場

逆旅整設

以通賈商

幸甚至哉 歌以詠志

冬十月

鄉土不同 河朔隆寒 流澌浮漂 舟船行難

錐不入地 豐籟深奧 水竭不流 冰堅可蹈

士隱者貧 勇俠輕非 心常歎怨 戚戚多悲

幸甚至哉 歌以詠志

土不同

神龜雖壽 猶有竟時 騰蛇乘霧 終爲土灰

驥老伏櫪 志在千里 烈士暮年 壯心不已

盈縮之期 不但在天 養怡之福 可得永年

幸甚至哉 歌以詠志

龜雖壽

淮南王篇

淮南王

自言尊

百尺高樓與天連

後園鑿井銀作牀

金瓶素綆汲寒漿

汲寒漿

飲少年

少年窈窕何能賢

揚聲悲歌音絕天

我欲渡河河無梁

願作雙黃鵠還故鄉

還故鄉入故里

徘徊故鄉

苦身不已

繁舞奇歌無不奏

徘徊桑梓遊天外

鼓角橫吹曲鼓按周禮以鼗鼓鼓軍事角說者云蚩尤氏帥魑魅與黃帝戰於涿鹿帝乃命始吹角爲龍鳴以禦之其後魏武北征烏丸越沙漠而軍士思歸於是減爲中鳴而尤更悲矣

胡角者本以應胡笳之聲後漸用之橫吹有雙角即胡樂也張博望入西域傳其法於西京惟得摩訶兜勒一曲李延年因胡曲更造新聲二十八解乘輿以爲武樂

後漢以給邊和帝時萬人將軍得之魏晉以來二十八  
解不復具存用者有黃鵠隴頭出關入關出塞入塞折  
楊柳黃單子赤之楊望行人十曲按魏晉之世有孫氏  
善引舊曲宋識善擊節唱和陳左善清歌列和善吹笛  
郝索善彈箏朱生善琵琶尤發新聲故傳玄著書曰人  
若欽所聞而忽所見不亦惑乎設此六人生於上世越  
今古而無儷何但夔牙同契哉按此說則自茲以後皆  
孫朱等之遺則也

相和漢舊歌也絲竹更相和執節者歌本一部魏明帝  
分爲二更遞夜宿本十七曲朱生宋識列和等復合之  
爲十三曲

但歌四曲自漢世無絃節作伎最先唱一人唱三人和  
魏武帝尤好之時有宋容華者清徹好聲善唱此曲當  
時之特妙自晉以來不復傳遂絕

凡樂章古辭今之存者並漢世街陌謠謳江南可採蓮  
烏生十五子白頭吟之屬也

吳歌雜曲並出江南東晉以來稍有增廣

子夜歌者女子名子夜造此聲孝武太元中琅邪王軻之家有鬼歌子夜則子夜是此時人也

鳳將雛歌者舊曲也應璩百一詩云言是鳳將雛然則其來久矣

前溪歌者車騎將軍沈亮所制

阿子及懽聞歌者穆帝升平初歌畢輒呼阿子汝聞不語在五行志後人行其聲以爲此二曲

團扇歌者中書令王珉與嫂婢有情愛好甚篤嫂捶撻婢過苦婢素善歌而珉好捉白團扇故制此歌  
慎懷歌者隆安初俗間訛謠之曲語在五行志

長史變者司徒左長史王廞臨敗所制

凡此諸曲始皆徒歌既而被之絃管又有因絲竹金石  
造歌以被之魏世三調歌辭之類是也

杯柈舞按太康中天下爲晉世寧舞矜手以按杯柈反  
覆之此則漢世惟有柈舞而晉加之以杯反覆之也

公莫舞今之巾舞也相傳云項莊劍舞項伯以袖隔之使不得害漢高祖且語項莊云公莫古人相呼曰公言公莫害漢王也今之用巾蓋像項伯衣袖之遺式然按琴操有公莫渡河曲然則其聲所從來已久俗云項伯非也

白紵舞按舞辭有巾袍之言紵本吳地所出宜是吳舞也晉俳歌又云皎皎白緒節節爲雙吳音呼緒爲紵疑白紵卽白緒也

鐸舞歌一篇幡舞歌一篇鼓舞伎六曲並陳於元會後  
漢正旦天子臨德陽殿受朝賀舍利從西方來戲於殿  
前激水化成比目魚跳躍嗽水作露翳日畢又化成龍  
長八九丈出水遊戲炫耀日光以兩大絲繩繫兩柱頭  
相去數丈兩倡女對舞行於繩上相逢切肩而不傾魏  
晉訖江左猶有夏育扛鼎巨象行乳神龜扞舞背負靈  
嶽桂樹白雪畫地成川之樂

成帝咸康七年尚書蔡謨奏八年正會儀注惟作鼓吹

鐘鼓其餘伎樂盡不作侍中張澄給事黃門侍郎陳達  
駁以爲王者觀時設教至於吉凶殊斷不易之道也今  
四方觀禮陵有儉弔之位庭奏宮懸之樂二禮兼用哀  
樂不分體國經制莫大於此詔曰今既以天下體大禮  
從權宜三正之饗宜盡用吉禮也至娛耳目之樂所不  
忍聞故闕之耳事之大者不過上壽酒稱萬歲已許其  
大不足復闕鍾鼓鼓吹也澄達又啓今大禮雖降事吉  
於朝然儉弔顯於園陵則未減有哀禮服定於典文義

無盡吉是以咸寧之會有徹樂之典實先朝稽古憲章  
垂式萬世者也詔曰若元日大饗萬國朝宗庭廢鐘鼓  
之奏遂闕起居之節朝無磬制之音實無蹈履之度其  
於義事不亦闕乎惟可量輕重以制事中散騎侍郎顧  
臻表曰臣聞聖王制樂贊揚政道養以仁義防其淫佚  
上享宗廟下訓黎元體五行之正音協八風以陶物宮  
聲正方而好義角聲堅齊而率禮絃歌鐘鼓金石之作  
備矣故通神至化有率舞之感移風易俗致和樂之極

末世之伎設禮外之觀逆行連倒頭足入笞之屬皮膚  
外剝肝心內摧敦彼行葦猶爲勿踐矧伊生靈而不惻  
愴加四海朝覲言觀帝庭耳聆雅頌之聲目覩威儀之  
序足以蹋天頭以履地反天地之至順傷彝倫之大方  
今夷狄對岸外禦爲急兵食七升忘身赴難過秦之戲  
日廩五斗方掃神州經略中甸若此之事不可示遠宜  
下太常纂備雅樂簫韶九成惟新於盛運功德頌聲永  
著于來葉此乃所以燕及皇天克昌厥後者也諸伎而

傷人者皆宜除之流簡儉之德邁康哉之休清風既行  
下應如草此之謂也愚管之誠惟垂採察於是除高緮  
紫鹿跂行鼈食及齊王捲衣竿兒等樂又減其廩其後  
復尚高緮紫鹿焉

晉書卷二十三

晉書卷二十三考證

樂志下歌穆帝○各本俱脫此一章今從宋志增入

景龍飛詞普被四海萬邦望風莫不來綏聖德潛斷先  
天弗違○普被以下共二十字監本脫去今從宋志  
增

玄雲詞周文獵渭濱遂載呂望歸符合如影響○周文  
以下十五字監本脫去今從宋志增

晉書卷二十三考證

欽定四庫全書薈要卷四千五十三

史部

晉書卷二十四

唐太宗文皇帝御撰

志第十四

職官

書曰唐虞稽古建官惟百所以獎導民萌裁成庶政易曰天垂象聖人則之執法在南宮之右上相處端門之外而烏龍居位雲火垂名前史詳之其以尚矣黃帝置

三公之秩以親黎元少昊配九扈之名以為農正命重  
黎於天地詔融冥於水火則可得而言焉伊尹曰三公  
調陰陽九卿通寒暑大夫知人事列士去其私而成湯  
居亳初置二相以伊尹仲虺為之凡厥樞會仰承君命  
總及周武下車成康垂則六卿分職二公弘化咸樹司  
存各題標準苟非其道入弗虛榮貽厥孫謀其固本也  
如此及秦變周官漢遵嬴舊或隨時適用或因務遷革  
霸王之典義在於斯既獲厥安所謂得其時制者也四

征興於漢代四安起於魏初四鎮通於柔遠四平止於

喪亂其渡遼凌江輕車強弩式過遐外用表攻伐興而

復毀厥號彌繁及當塗得志尅平諸夏初有軍師祭酒

叅掌戎律建安十三年罷漢台司更置丞相而以曹公

居之用兼端揆孫吳劉蜀多依漢制雖復臨時命氏而

無忝舊章世祖武皇帝即位之初以安平王孚為太宰

鄭沖為太傅王祥為太保司馬望為太尉何曾為司徒

荀顛為司空石苞為大司馬陳騫為大將軍世所謂八

公同辰攀雲附翼者也若乃成乎棟宇非一枝之勢處  
乎經綸稱萬夫之敵或牽羊以叶於夢或垂釣以申其  
道或空桑以獻其術或搯版以啓其心臥龍飛鴻方金  
擬璧秦奚鄭產楚材晉用斯亦曩時之良具其又昭彰  
者焉宣王既誅曹爽政由已出網羅英俊以備天官及  
蘭卿受羈貴公顯戮雖復策名魏氏而乃心皇晉及文  
王纂業初啓晉臺始置二衛有前驅養由之弩及設三  
部有熊渠攸飛之衆是以武帝龍飛乘茲奮翼猶武王

以周之十亂而理殷民者也是以秦始盡於太康喬柯  
茂葉來居斯位自太興訖于建元南金北銑用處茲秩  
雖未擬乎夔拊龍言天工人代亦庶幾乎任官惟賢蒞  
事惟能者也

丞相相國並秦官也晉受魏禪並不置自惠帝之後省  
置無恒為之者趙王倫梁王彤成都王穎南陽王保王  
敦王導之徒皆非復尋常人臣之職

太宰太傅太保周之三公官也魏初唯置太傅以鍾繇

為之末年又置太保以鄭沖為之晉初以景帝諱故又採周官官名置太宰以代太師之任秩增三司與太傅太保皆為上公論道經邦燮理陰陽無其人則闕以安平獻王孚居之自渡江以後其名不替而居之者甚寡太尉司徒司空並古官也自漢歷魏置以為三公及晉受命迄江左其官相承不替

大司馬古官也漢制以冠大將軍驃騎車騎之上以代太尉之職故恒與太尉迭置不並列及魏有太尉而大

司馬大將軍各自為官位在三司上晉受魏禪因其制以安平王孚為太宰鄭沖為太傅王祥為太保義陽王望為太尉何曾為司徒荀顛為司空石苞為大司馬陳騫為大將軍凡八公同時並置唯無丞相焉自義陽王望為大司馬之後定令如舊在三司上

大將軍古官也漢武帝置冠以大司馬名為崇重之職及漢東京大將軍不常置為之者皆擅朝權至景帝為大將軍亦受非常之任後以叔父孚為太尉奏改大將

軍在太尉下及晉受命猶依其制位次三司下後復舊  
在三司上太康元年琅邪王佃遷大將軍復制在三司  
下佃薨後如舊

開府儀同三司漢官也殤帝延平元年鄧騭為車騎將  
軍儀同三司儀同之名始自此也及魏黃權以車騎將  
軍開府儀同三司開府之名起於此也

驃騎車騎衛將軍伏波撫軍都護鎮軍中軍四征四鎮  
龍驤典軍上軍輔國等大將軍左右光祿光祿三大夫

開府者皆為位從公

太宰太傅太保司徒司空左右光祿大夫光祿大夫開府位從公者為文官公冠進賢三梁黑介幘

大司馬大將軍太尉驃騎車騎衛將軍諸大將軍開府位從公者為武官公皆著武冠平上黑幘

文武官公皆假金章紫綬著五時服其相國丞相皆袞冕綠蓋綬所以殊於常公也

諸公及開府位從公者品秩第一食奉日五斛太康二

年又給絹春百匹秋絹二百匹縣二百斤元康元年給菜田十頃騶十人立夏後不及田者食奉一年置長史一人秩一千石西東閤祭酒西東曹掾戶倉賊曹令史屬各一人御屬閤下令史西東曹倉戶賊曹令史門令史記室省事令史閤下記室書令史西東曹學事各一人給武賁二十人持班劍給朝車駕駟安車黑耳駕三各一乘祭酒掾屬白蓋小車七乘輅車施耳後戶阜輪犢車各一乘自祭酒已下令史已上皆阜零辟朝服太

尉雖不加兵者吏屬皆絳服司徒加置左右長史各一人秩千石主簿左西曹掾屬各一人西曹稱右西曹其左西曹令史已下人數如舊令司空加置導橋掾一人諸公及開府位從公加兵者增置司馬一人秩千石從事中郎二人秩比千石主簿記室督各一人舍人四人工鎧士曹營軍刺姦帳下都督外都督令史各一人主簿已下令史已上皆絳服司馬給吏卒如長史從事中郎給侍二人主簿記室督各給侍一人其餘臨時增崇

者則褒加各因其時為節文不為定制

諸公及開府位從公為持節都督增叅軍為六人長史  
司馬從事中郎主簿記室督祭酒掾屬舍人如常加兵  
公制

特進漢官也二漢及魏晉以加官從本官車服無吏卒  
太僕羊琇遜位拜特進加散騎常侍無餘官故給吏卒  
車服其餘加特進者唯食其祿賜位其班位而已不別  
給特進吏卒車服後定令特進品秩第二位次諸公在

開府驃騎上冠進賢兩梁黑介幘五時朝服佩水蒼玉  
無章綬食奉日四斛太康二年始賜春服絹五十匹秋  
絹百五十匹絲一百五十斤元康元年給菜田八頃田  
騶八人立夏後不及田者食奉一年置主簿功曹史門  
亭長門下書佐各一人給安車黑耳駕御一人輶車施  
耳後戶一乘

左右光祿大夫假金章紫綬光祿大夫加金章紫綬者  
品秩第二祿賜班位冠幘車服佩玉置吏卒羽林及卒

諸所賜給皆與特進同其以為加官者唯假章綬祿賜班位而已不別給車服吏卒也又卒贈此位本已有卿官者不復重給吏卒其餘皆給

光祿大夫假銀章青綬者品秩第三位在金紫將軍下諸卿上漢時所置無定員多以為拜假賙贈之使及監護喪事魏氏已來轉復優重不復以為使命之官其諸公告老者皆家拜此位及在朝顯職復用加之及晉受命仍舊不改復以為優崇之制而諸公遜位不復加之

或更拜上公或以本封食公祿其諸卿尹中朝大官年老致仕者及內外之職如此者前後甚衆由是或因得開府或進加金章紫綬又復以為禮贈之位秦始皇唯太子詹事楊珣加給事中光祿大夫加兵之制諸所供給依三品將軍其餘自如舊制終武惠孝懷三世

光祿大夫與卿同秩中二千石著進賢兩梁冠黑介幘五時朝服佩水蒼玉食奉日三斛太康二年始給春賜絹五十匹秋絹百匹絲百斤惠帝元康元年始給菜田

六頃田騶六人置主簿功曹史門亭長門下書佐各一人

驃騎已下及諸大將軍不開府非持節都督者品秩第二其祿與特進同置長史司馬各一人秩千石主簿功曹史門下督錄事兵鎧士賊曹營軍刺姦帳下都督功曹書佐門吏門下書吏各一人其假節為都督者所置與四征鎮加大將軍不門府為都督者同四征鎮安平加大將軍不開府持節都督者品秩第二置叅佐吏卒

幕府兵騎如常都督制唯朝會祿賜從二品將軍之例然則持節都督無定員前漢遣使始有持節光武建武初征伐四方始權時置督軍御史事竟罷建安中魏武為相始遣大將軍督之二十一年征孫權還夏侯惇督二十六軍是也魏文帝黃初三年始置都督諸州軍事或領刺史又上軍大將軍曹真都督中外諸軍事假黃鉞則總統內外諸軍矣魏明帝太和四年秋宣帝征蜀加號大都督高貴鄉公正元二年文帝都督中外諸軍

尋加大都督及晉受禪都督諸軍為上監諸軍次之督諸軍為下使持節為上持節次之假節為下使持節得殺二千石以下持節殺無官位人若軍事得與使持節同假節唯軍事得殺犯軍令者江左以來都督中外尤重唯王導等權重者乃居之

三品將軍秩中二千石者著武冠平上黑幘五時朝服佩水蒼玉食奉春秋賜繇絹菜田田騶如光祿大夫諸卿制置長史司馬各一人秩千石主簿功曹門下都督

錄事兵鎧士賊曹營軍刺姦吏帳下都督功曹書佐門吏門下書吏各一人

錄尚書案漢武時左右曹諸吏分平尚書奏事知樞要者始領尚書事張安世以車騎將軍霍光以大將軍王鳳以大司馬師丹以左將軍並領尚書事後漢章帝以太傅趙憙太尉牟融並錄尚書事尚書有錄名蓋自憙融始亦西京領尚書之任猶虞唐大麓之職也和帝時大尉鄧彪為太傅錄尚書事位上公在三公上漢制遂

以為常每少帝立則置太傅錄尚書事猶古冢宰總已之義薨輒罷之自魏晉以後亦公卿權重者為之

尚書令秩千石假銅印黑綬冠進賢兩梁冠納言幘五時朝服佩水蒼玉食奉月五十斛受拜則策命之以在端右故也太康二年始給賜絹春三十匹秋七十匹緜七十斤元康元年始給菜田六頃田騶六人立夏後不及田者食奉一年始賈克為尚書令以目疾表置省事吏四人省事蓋自此始

僕射服秩印綬與令同案漢本置一人至漢獻帝建安  
四年以執金吾榮邵為尚書左僕射僕射分置左右蓋  
自此始經魏至晉迄於江左省置無恒置二則為左右  
僕射或不兩置但曰尚書僕射令闕則左為省主若左  
右並闕則置尚書僕射以主左事

列曹尚書案尚書本漢承秦置及武帝遊宴後庭始用  
宦者主中書以司馬遷為之中間遂罷其官以為中書  
之職至成帝建始四年罷中書宦者又置尚書五人一

人為僕射而四人分為四曹通掌圖書秘記章奏之事各有其任其一曰常侍曹主丞相御史公卿事其二曰二千石曹主刺史郡國事其三曰民曹主吏民上書事其四曰主客曹主外國夷狄事後成帝又置三公曹主斷獄是為五曹後漢光武以三公曹主歲盡考課諸州郡事改常侍曹為吏部曹主選舉祠祀事民曹主繕修功作鹽池園苑事客曹主護駕羌胡朝賀事二千石曹主辭訟事中都官曹主水火盜賊事合為六曹并令僕

二人謂之八座尚書雖有曹名不以為號靈帝以侍中  
梁鵠為選部尚書於此始見曹名及魏改選部為吏部  
主選部事又有左民客曹五兵度支凡五曹尚書二僕  
射一令為八座及晉置吏部三公客曹駕部屯田度支  
六曹而無五兵咸寧二年省駕部尚書四年省一僕射  
又置駕部尚書太康中有吏部殿中及五兵田曹度支  
左民為六曹尚書又無駕部三公客曹惠帝世又有右  
民尚書止於六曹不知此時省何曹也及渡江有吏部

祠部五兵左民度支五尚書祠部尚書常與右僕射通職不恒置以右僕射攝之若右僕射闕則以祠部尚書攝知右事

左右丞自漢武帝建始四年置尚書而便置丞四人及光武始減其二唯置左右丞左右丞蓋自此始也自此至晉不改晉左丞主臺內禁令宗廟祠祀朝儀禮制選用署吏急假右丞掌臺內庫藏廬舍凡諸器用之物及廩振人租布刑獄兵器督錄遠道文書章表奏事八座

郎初拜皆沿漢舊制並集都座交禮遷職又解交焉

尚書郎西漢舊置四人以分掌尚書其一人主匈奴單  
于營部一人主羌夷吏民一人主戶口墾田一人主財  
帛委輸及光武分尚書為六曹之後合置三十四人秩  
四百石并左右丞為三十六人郎主作文書起草更直  
五日於建禮門內尚書郎初從三署詣臺試守尚書郎  
中歲滿稱尚書郎三年稱侍郎選有吏能者為之至魏  
尚書郎有殿中吏部駕部金部虞曹比部南主客祠部

度支庫部農部水部儀曹三公倉部民曹二千石中兵  
外兵都兵別兵考功定課凡二十三郎青龍二年尚書  
陳矯奏置都官騎兵合凡二十五郎每一郎缺白試諸  
孝廉能結文案者五人謹封奏其姓名以補之及晉受  
命武帝罷農部定課置直事殿中祠部儀曹吏部三公  
比部金部倉部度支都官二千石左民右民虞曹屯田  
起部水部左右主客駕部車部庫部左右中兵左右外  
兵別兵都兵騎兵左右士北主客南主客為三十四曹

郎後又置運曹凡三十五曹置郎二十三人更相統攝  
及江左無直事右民屯田車部別兵都兵騎兵左右士  
運曹十曹郎康穆以後又無虞曹二千石二郎但有殿  
中祠部吏部儀曹三公比部金部倉部度支都官左民  
起部水部主客駕部庫部中兵外兵十八曹郎後又省  
主客起部水部餘十五曹云

侍中案黃帝時風后為侍中於周為常伯之任秦取古  
名置侍中漢因之秦漢俱無定員以功高者一人為僕

射魏晉以來置四人別加官者則非數掌儼贊威儀大  
駕出則次直侍中護駕正直侍中負璽陪乘不帶劔餘  
皆騎從御登殿與散騎常侍對扶侍中居左常侍居右  
備切問近對拾遺補闕及江左哀帝興寧四年桓溫奏  
省二人後復舊

給事黃門侍郎秦官也漢已後並因之與侍中俱管門  
下衆事無員及晉置員四人

散騎常侍本秦官也秦置散騎又置中常侍散騎騎從

乘輿車後中常侍得入禁中皆無員亦以為加官漢東京初省散騎而中常侍用宦者魏文帝黃初初置散騎合之於中司掌規諫不典事貂璫插右騎而散從至晉不改及元康中惠帝始以宦者董猛為中常侍後遂止常為顯職

給事中秦官也所加或大夫博士議郎掌顧問應對位次中常侍漢因之及漢東京省魏世復置至晉不改在散騎常侍下給事黃門侍郎上無員

通直散騎常侍案魏末散騎常侍又有在員外者秦始皇十年武帝使二人與散騎常侍通員直故謂之通直散騎常侍江左置四人

員外散騎常侍魏末置無員

散騎侍郎四人魏初與散騎常侍同置自魏至晉散騎常侍侍郎與侍中黃門侍郎共平尚書奏事江左乃罷通直散騎侍郎四人初武帝置員外散騎侍郎及太興元年元帝使二人與散騎侍郎通員直故謂之通直散

騎侍郎後增為四人

員外散騎侍郎武帝置無員

奉朝請本不為官無員漢東京罷三公外戚宗室諸侯  
多奉朝請奉朝請者奉朝會請召而已武帝亦以宗室  
外戚為奉車駙馬騎三都尉而奉朝請焉元帝為晉王  
以叅軍為奉車都尉掾屬為駙馬都尉行叅軍舍人為  
騎都尉皆奉朝請後罷奉車騎二都尉唯留駙馬都尉  
奉朝請諸尚公主者劉惓桓溫皆為之

中書監及令案漢武帝遊宴後庭始使宦者典事尚書  
謂之中書謁者置令僕射成帝改中書謁者令曰中謁  
者令罷僕射漢東京省中謁者令而有中官謁者令非  
其職也魏武帝為魏王置秘書令典尚書奏事文帝黃  
初初改為中書置監令以秘書左丞劉放為中書監右  
丞孫資為中書令監令蓋自此始也及晉因之並置一  
人

中書侍郎魏黃初初中書既置監令又置通事郎次黃

門郎黃門郎已署事過通事乃署名已署奏以入為帝  
省讀書可及晉改曰中書侍郎員四人中書侍郎蓋此  
始也及江左初改中書侍郎曰通事郎尋復為中書侍  
郎

中書舍人案晉初初置舍人通事各十人江左令舍人  
通事謂之通事舍人掌呈奏案後省而以中書侍郎一  
人直西省又掌詔命

秘書監案漢桓帝延熹三年置秘書監後省魏武為魏

王置秘書令丞及文帝黃初初置中書令典尚書奏事而秘書改令為監後以何禎為秘書丞而秘書先自有丞乃以禎為秘書右丞及晉受命武帝以秘書并中書省其秘書著作之局不廢惠帝永平中復置秘書監其屬官有丞有郎并統著作省

著作郎周左史之任也漢東京圖籍在東觀故使名儒著作東觀其有名尚未有官魏明帝太和中詔置著作郎於此始有其官隸中書省及晉受命武帝以繆徵為

中書著作郎元康二年詔曰著作舊屬中書而秘書既  
典文籍今改中書著作為秘書著作於是改隸秘書省  
後別自置省而猶隸秘書著作郎一人謂之大著作郎  
專掌史任又置佐著作郎八人著作郎始到職必撰名  
臣傳一人

太常光祿勳衛尉大僕廷尉大鴻臚宗正大司農少府  
將作大匠太后三卿大長秋皆為列卿各置丞功曹主  
簿五官等員

太常有博士協律校尉員又統太學諸博士祭酒及太史太廟太樂鼓吹陵等令太史又別置靈臺丞

太常博士魏官也魏文帝初置晉因之掌引導乘輿王公已下應追諡者則博士議定之

協律校尉漢協律都尉之職也魏杜夔為之及晉改為協律校尉

晉初承魏制置博士十九人及咸寧四年武帝初立國子學定置國子祭酒博士各一人助教十五人以教生

徒博士皆取履行清淳通明典義者若散騎常侍中書侍郎太子中庶子以上乃得召試及江左初減為九人元帝末增儀禮春秋公羊博士各一人合為十一人後又增為十六人不復分掌五經而謂之太學博士也孝武太元十年損國子助教員為十人

光祿勳統武賁中郎將羽林郎將冗從僕射羽林左監五官左右中郎將東園匠太官御府守宮黃門掖庭清商華林園暴室等令哀帝興寧二年省光祿勳并司徒

孝武寧康元年復置

衛尉統武庫公車衛士諸治等令左右都候南北東西  
督治掾及渡江省衛尉

太僕統典農典虞都尉典虞丞左右中典牧都尉車府  
典牧乘黃廐驎騮廐龍馬廐等令典牧又別置羊牧丞  
太僕自元帝渡江之後或省或置太僕省故驎騮為門  
下之職

廷尉主刑法獄訟屬官有正監評并有律博士員

大鴻臚統大行典客園池華林園鈎盾等令又有青宮  
列丞鄴玄武苑丞及江左有事則權置無事則省

宗正統皇族宗人圖謀又統太醫令史又有司牧掾員  
及渡江哀帝省并太常太醫以給門下省

大司農統太倉籍田導官三令襄國都水長東西南北  
部護漕掾及渡江哀帝省并都水孝武復置

少府統材官校尉中左右三尚方中黃左右藏左校甄  
官平準奚官等令左校坊鄴中黃左右藏油官等丞及

渡江哀帝省并丹陽尹孝武復置自渡江唯置一尚方  
又省御府

將作大匠有事則置無事則罷

太后三卿衛尉少府太僕漢置皆隨太后宮為官號在  
同名卿上無太后則闕魏改漢制在九卿下及晉復舊  
在同號卿上

大長秋皇后卿也有后則置無則省

御史中丞本秦官也秦時御史大夫有二丞其一御史

丞其一為中丞中丞外督部刺史內領侍御史受公卿奏事舉劾按章漢因之及成帝綏和元年更名御史大夫為大司空置長史而中丞官職如故哀帝建平二年復為御史大夫元壽二年又為大司空而中丞出外為御史臺主歷漢東京至晉因其制以中丞為臺主

治書侍御史案漢宣帝幸宣室齋居而決事令侍御史二人治書侍側後因別置謂之治書侍御史蓋其始也及魏又置治書執法掌奏劾而治書侍御史掌律令二

官俱置及晉唯置治書侍御史員四人泰始四年又置  
黃沙獄治書侍御史一人秩與中丞同掌詔獄及廷尉  
不當者皆治之後并河南遂省黃沙治書侍御史及太  
康中又省治書侍御史二員

侍御史案二漢所掌凡有五曹一曰令曹掌律令二曰  
印曹掌刻印三曰供曹掌齋祠四曰尉馬曹掌廐馬五  
曰乘曹掌護駕魏置八人及晉置員九人品同治書而  
有十三曹吏曹課第曹直事曹印曹中都督曹外都督

曹媒曹符節曹水曹中壘曹營軍曹法曹算曹及江左  
初省課第曹置庫曹掌廐牧牛馬市租後分曹置外左  
庫內左庫云

殿中侍御史案魏蘭臺遣二御史居殿中伺察非法即  
其始也及晉置四人江左置二人又案魏晉官品令又  
有禁防御史第七品孝武太元中有檢校御史吳琨則  
此二職亦蘭臺之職也

符節御史秦符璽令之職也漢因之位次御史中丞至

魏別為一臺位次御史中丞掌授節銅武符竹使符及  
泰始九年武帝省并蘭臺置符節御史掌其事焉

司隸校尉案漢武初置十三州刺史各一人又置司隸  
校尉察三輔三河弘農七郡歷漢東京及魏晉其官不  
替屬官有功曹都官從事諸曹從事部郡從事主簿錄  
事門下書佐省事記室書佐諸曹書佐守從事武猛從  
事等員凡吏一百人卒三十二人及渡江乃罷司隸校  
尉官其職乃揚州刺史也

謁者僕射秦官也自漢至魏因之魏置僕射掌大拜授  
及百官班次統謁者十人及武帝省僕射以謁者并闌  
臺江左復置僕射後又省

都水使者漢水衡之職也漢又有都水長丞主陂池灌  
溉保守河渠屬太常漢東京省都水置河隄謁者魏因  
之及武帝省水衡置都水使者一人以河隄謁者為都  
水官屬及江左省河隄謁者置謁者六人

中領軍將軍魏官也漢建安四年魏武丞相府自置及

拔漢中以曹休為中領軍文帝踐祚始置領軍將軍以曹休為之主五校中壘武衛等三營武帝初省使中軍將軍羊祜統二衛前後左右驍衛等營即領軍之任也懷帝永嘉中改中軍曰中領軍永昌元年改曰北軍中候尋復為領軍成帝世復為中候尋復為領軍

護軍將軍案本秦護軍都尉官也漢因之高祖以陳平為護軍中尉武帝復以為護軍都尉屬大司馬魏武為相以韓浩為護軍史魚為領軍非漢官也建安十二年

改護軍為中護軍領軍為中領軍置長史司馬魏初因置護軍將軍主武官選隸領軍晉世則不隸也元帝永昌元年省護軍并領軍明帝太寧二年復置領護各領營兵江左以來領軍不復別領營總統二衛驍騎材官諸營護軍猶別有營也資重者為領軍護軍資輕者為中領軍中護軍屬官有長史司馬功曹主簿五官受命出軍則置叅軍

左右衛將軍案文帝初置中衛及武帝受命分為左右

衛以羊琇為左趙序為右並置長史司馬功曹主簿員  
江左罷長史

驍騎將軍游擊將軍並漢雜號將軍也魏置為中軍及  
晉以領護左右衛驍騎游擊為六軍

左右前後軍將軍案魏明帝時有左軍則左軍魏官也  
至晉不改武帝初又置前軍右軍泰始八年又置後軍  
是為四軍

屯騎步兵越騎長水射聲等校尉是為五校並漢官也

魏晉逮于江左猶領營兵並置司馬功曹主簿後省左軍右軍前軍後軍為鎮衛軍其左右營校尉自如舊皆中領軍統之二衛始制前驅由基彊弩為三部司馬各置督史左衛熊渠武賁右衛攸飛武賁二衛各五部督其命中武賁驍騎遊擊各領之又置武賁羽林上騎異力四部并命中為五督其衛鎮四軍如五校各置千人更制殿中將軍中郎校尉司馬此驍騎持椎斧武賁分屬二衛尉中武賁持鉞冗從羽林司馬常從人數各有

差武帝甚重兵官故軍校多選朝廷清望之士居之先是陳勰為文帝所待特有才用明解軍令帝為晉王委任使典兵事及蜀破後令勰受諸葛亮圍陣用兵倚伏之法又甲乙校標幟之制勰悉闇練之遂以勰為殿中典兵中郎將遷將軍久之武帝每出入勰持白獸幡在乘輿左右鹵簿陳列齊肅太康末武帝嘗出射雉勰時已為都水使者散從車駕逼暗乃還漏已盡當合函停乘輿良久不得合乃詔勰合之勰舉白獸幡指麾須臾

之間而函成皆謝勰閑解甚為武帝所任

太子太傅少傅皆古官也秦始皇三年武帝始建官各置一人尚未置詹事官事無大小皆由二傅並有功曹主簿五官太傅中二千石少傅二千石其訓導者太傅在前少傅在後皇太子先拜諸傅然後答之武帝後以儲副體尊遂命諸公居之以本位重故或行或領時侍中任愷武帝所親敬復使領之蓋一時之制也咸寧元年以給事黃門侍郎楊珣為詹事掌宮事二傅不復領官

屬及楊珽為衛將軍領少傅省詹事遂宗廣傅訓命太尉賈充領太保司空齊王攸領太傅所置吏屬復如舊二傅進賢兩梁冠黑介幘五時朝服佩水蒼玉食奉日三斛太康二年始給春賜絹五十匹秋絹百匹緜百斤其後太尉汝南王亮車騎將軍楊駿司空衛瓘石鑿皆領傅保猶不置詹事以終武帝之世惠帝元康元年復置詹事二傅給菜田六頃田騶六人立夏後不及田者食奉一年置丞一人秩千石主簿五官掾功曹史主記

門下史錄事戶曹法曹倉曹賊曹功曹書佐門下亭長  
門下書佐省事各一人給赤印安車一乘及愍懷建官  
乃置六傅三太三少以景帝諱師故改太師為太保通  
省尚書事詹事文書關由六傅然自元康之後諸傅或  
二或三或四或六及永康中復不置詹事也自太安已  
來置詹事終孝懷之世渡江之後有太傅少傅不立師  
保

中庶子四人職如侍中

中舍人四人咸寧四年置以舍人才學美者為之與中庶子共掌文翰職如黃門侍郎在中庶子下洗馬上食官令一人職如太官令

庶子四人職比散騎常侍中書監令

舍人十六人職比散騎中書等侍郎

洗馬八人職如謁者秘書掌圖籍釋奠講經則掌其事出則直者前驅導威儀

率更令主宮殿門戶及賞罰事職如光祿勳衛尉

家令主刑獄穀貨飲食職比司農少府漢東京主食官  
令食官令及晉自為官不復屬家令

僕主車馬親族職如太僕宗正

左右衛率案惠帝建東宮置衛率初曰中衛率泰始五  
年分為左右各領一軍惠帝時愍懷太子在東宮又加  
前後二率及江左省前後二率孝武太元中又置

王置師友文學各一人景帝諱故改師為傅友者因文  
王仲尼四友之名號改太守為內史省相及僕有郎中

令中尉大農為三卿大國置左右常侍各一人省郎中  
置侍郎二人典書典祠典衛學官令典書丞各一人治  
書四人中尉司馬世子庶子陵廟牧長各一人謁者四  
人中大夫六人舍人十人典府各一人咸寧三年衛將  
軍楊珣與中書監荀勗以齊王攸有時望懼惠帝有後  
難因追故司空裴秀立五等封建之旨從容共陳時宜  
於武帝以為古者建侯所以藩衛王室今吳寇未殄方  
岳任大而諸王為帥都督封國既各不臣其統內於事

重非宜又異姓諸將居邊宜參以親戚而諸王公皆在  
京都非扞城之義萬世之固帝初未之察於是下詔議  
其制有司奏從諸王公更制戶邑皆中尉領兵其平原  
汝南琅邪扶風齊為大國梁趙樂安燕安平義陽為次  
國其餘為小國皆制所近縣益滿萬戶又為郡公制度  
如小國王亦中尉領兵郡侯如不滿五千戶王置一軍  
一千一百人亦中尉領之于時唯特增魯國公戶邑追  
進封故司空博陵公王沈為郡公鉅平侯羊祐為南城

郡侯又南宮王承隨王萬各於秦始中封為縣王邑千戶至是改正縣王增邑為三千戶制度如郡侯亦置一軍自此非皇子不得為王而諸王之支庶皆皇家之近屬至親亦各以土推恩受封其大國次國始封王之支子為公承封王之支子為侯繼承封王之支子為子伯小國五千戶已上始封王之支子為子不滿五千戶始封王之支子及始封公侯之支子皆為男非此皆不得封其公之制度如五千戶國侯之制度如不滿五千戶國

亦置一軍千人中尉領之伯子男以下各有差而不置  
軍大國始封之孫罷下軍曾孫又罷上軍次國始封子  
孫亦罷下軍其餘皆以一軍為常大國中軍二千人上  
下軍各千五百人次國上軍二千人下軍千人其未之  
國者大國置守土百人次國八十人小國六十人郡侯  
縣公亦如小國制度既行所增徒各如本奏遣就國而  
諸公皆戀京師涕泣而去及吳平後齊王攸遂之國  
中朝制典書令在常侍下侍郎上及渡江則侍郎次常

侍而典書令居三軍下公國則無中尉常侍三軍侯國  
又無大農侍郎伯子男唯典書以下又無學官令史職  
皆以次損焉公侯以下置官屬隨國大小無定制其餘  
官司各有差名山大澤不以封鹽鐵金銀銅錫始平之  
竹園別都宮室園囿皆不為屬國其仕在天朝者與之  
國同皆自選其文武官諸入作卿士而其世子年已壯  
者皆遣蒞國其王公已下茅社符璽車旗命服一如泰  
始初故事

州置刺史別駕治中從事諸曹從事等員所領中郡以上及江陽朱提郡各置部從事一人小郡亦置一人又有主簿門亭長錄事記室書佐諸曹佐守從事武猛從事等凡吏四十一人卒二十人諸州邊遠或有山險濱近寇賊羌夷者又置弓馬從事五十餘人徐州又置淮海涼州置河津諸州置都水從事各一人涼益州置吏八十五人卒二十人荊州又置監佃督一人

郡皆置太守河南郡京師所在則曰尹諸王國以內史

掌太守之任又置主簿主記室門下賊曹議生門下史  
記室史錄事史書佐循行幹小史五官掾功曹史功曹  
書佐循行小史五官掾等員郡國戶不滿五千者置吏  
職五十人散吏十三人五千戶以上則職吏六十三人  
散吏二十一人萬戶以上職吏六十九人散吏三十九  
人郡國皆置文學掾一人

縣大者置令小者置長有主簿錄事史主記室史門下  
書佐幹游徼議生循行功曹史小史廷掾功曹史小史

書佐幹戶曹掾史幹法曹門幹金倉賦曹掾史兵曹史  
吏曹史獄小史獄門亭長都亭長賊捕掾等員戶不滿  
三百以下職吏十八人散吏四人三百以上職吏二十  
八人散吏六人五百以上職吏四十人散吏八人千以  
上職吏五十三人散吏十二人千五百以上職吏六十  
八人散吏一十八人三千已上職吏八十八人散吏二  
十六人

郡國及縣農月皆隨所領戶多少為差散吏為勸農又

縣五百以上皆置鄉三千以上置二鄉五千以上置三鄉萬以上置四鄉鄉置耆夫一人鄉戶不滿千以下置治書史一人千以上置史佐各一人正一人五千五百以上置吏一人佐二人縣率百戶置里吏一人其土廣人稀聽隨宜置里吏限不得減五十戶千以上置校官掾一人

縣皆置方畧吏四人洛陽縣置六部尉江左以後建康亦置六部尉餘大縣置二人次縣小縣各一人鄴長安

置吏如三千戶以上之制

四中郎將並後漢置歷魏及晉並有其職江左彌重

護羌夷蠻等校尉案武帝置南蠻校尉於襄陽西戎校尉於長安南夷校尉於寧州元康中護羌校尉為涼州刺史西戎校尉為雍州刺史南蠻校尉為荊州刺史及江左初省南蠻校尉尋又置於江陵改南夷校尉曰鎮蠻校尉及安帝時於襄陽置寧蠻校尉

護匈奴羌戎蠻夷越中郎將案武帝置四中郎將或領

刺史或持節為之武帝又置平越中郎將居廣州主護南越

晉書卷二十四

晉書卷二十四考證

職官志左右衛將軍案文帝初置中衛及武帝受命分

為左右衛○各本武字上衍魏字

臣龍官

按晉文帝

為相國時置中尉則此承上文言之乃晉武非魏武也今刪去

晉書卷二十四考證

謹案卷二十三第十七頁前五行謙謙德其興毛  
本其作所


第三十頁後三行隆安初俗間訛謠之曲刊本脫  
初字據毛本監本增

第三十三頁前一行頭足人答之屬刊本答訛管  
據毛本改

卷二十四第十一頁後六行主選舉刊本選訛遷  
據諸本改

第十二頁後五行光武始減其二刊本二訛三據  
諸本改

第三十二頁前三行三百以上職吏二十八人刊  
本上訛下今改



總校官庶吉士 臣張能照

校對官檢討 臣王坦修

騰錄監生 臣潘承煒

騰錄監生 臣王日枝